

瓊州府志卷之四十四

雜志四 遺事

圖經馬伏波之平海南也命陶者為瓦器大者數石小者二三斗招黎人遺之任其所擇黎人惟取二三斗者云來時皆懸崖緣木而下取大者不能歸耳 輿地紀勝

桂海虞衡志云黎母之巔雖生黎亦不能至相傳其上有入壽考逸樂不與世接虎豹守險無路可扳但覺水泉甘美絕異爾初疑其言近聞之熟黎者曰村代生一壽婦主諸岐已嘗至山下有淵泉極甘旁皆果殼鳥羽盡中原所有者余

瓊州府志

卷四十四

雜志 遺事

方知石湖之言或有據也岐乃生黎中荒昧不

服王化者岐當作匏 海槎餘錄

韋執誼貶崖州司戶刺史憫其羈旅乃舉前件官在朝廷頗諳公事幸期佐理勿憚縻賢參攝衛

事 嶺南異物志

海南村戶在唐時已稱極盛故李贊皇詩云魚鹽家給無墟市禾黍年登有酒尊可以想其物產之饒富矣 蕭志

李德裕到崖州遺段成式書曰自到崖州幸且頑健居人多養雞往往飛入官舍今且作祝雞翁

六帖 據 黃通志 修

李德裕爲太子少保分司東都嘗召一僧問已之
休咎僧曰公災當萬里南去曰南去遂不還乎
僧曰當還耳公訊其事對曰相公平生當食萬
羊今食九千五百矣所以當還者未盡五百羊
耳公慘然而嘆曰吾師果至人耶我元和十三
年爲丞相張公從事於此都嘗夢行晉山見山
上盡目皆羊有牧羊者十數迎拜我我因問牧
者牧者曰此侍御平生所食羊嘗識此夢不洩
於人今者果如師之說耶後旬日振武節度使
米暨遣使致書於公且饋四百羊公大驚卽名
告其事僧嘆曰萬羊將滿公其不還乎公曰吾

瓊州府志

卷四

雜志 遺事

二

不食之亦可免耶曰羊至此已爲國相所有公
蹙然不悅旬日貶潮州司馬連貶崖州司戶

類聚詩話交趾有鬼門關其南多瘴癘去者罕得
生還諺曰鬼門關十人去九不還唐李德裕貶
崖州經此賦詩云一去一萬里千之千不還崖
州在何處生度鬼門關竟沒於荒裔

俱同

李衛公在珠崖表弟某侍郎遣人餉以衣物公有
書答謝之曰天地窮人物情所棄雖爲骨肉亦
無音書平生舊知無復弔問閣老至仁念舊再
降專人兼賜衣服器物茶藥至多開緘發紙涕
咽難勝大海之中無人拯恤資儲蕩盡家事一

空百口嗷然往往絕食塊獨窮悴終日若飢惟恨垂沒之年須作餒而之鬼十月未伏枕七旬藥物陳褻又無醫人委命信天幸而自活書後云閏十一月二十日從表兄崖州司戶參軍同正李德裕狀侍郎十九弟案德裕以大中二年十月自潮州司馬貶崖州所謂閏十一月正在三年蓋到崖才十餘月爾而窮困苟生已如是唐書本傳云貶之明年卒則是此書既發之後旋踵下世也當是時宰相皆其怨讐故雖骨肉之親平生之舊皆不敢復通音問而某侍郎至於再遣專使其爲高義絕俗可知惜乎姓名不

可得而考耳此帖藏禁中後出付秘閣今勒石於道山堂西紹興中趙忠簡公亦謫珠崖士大夫畏秦氏如虎無一人敢輒寄聲張淵道爲廣西師帥屢遣兵校持書及藥石酒麴爲餽公嘗答書云鼎之爲己爲人一至於此其述酸寒苦厄之狀畧與衛公同

賓退錄

竇儀言於諸弟張洎引滿語其故曰我必不作宰相亦不詣崖州吾門可保矣旣而召學士盧多遜多遜嘗有憾於趙普又喜其進遂攻普之短出鎮河陽普之罷甚危賴以勲舊脫禍多遜遂參知政事作相太平興國七年普復入相多遜

有崖州之行是其言之驗也四六話盧多遜亦相謫海外國史載其謝表末云流星已遠拱北極以無由海日空懸望長安而不見又其孫載作范陽家誌附其臨終自作遺表畧云昔日位居黃閣衆口鑠金此時身謝朱崖蔓草縈骨雖有五代衰氣然亦可哀矣

類聚

丁崖州多智數在海外有一販夫輒與數百緡任其貨易歲久不問商人疑其意且欲報之曰相公或使之雖死不避丁乃預計南京春宴必有中使在坐因作表乞還封爲書投府坐約商人曰汝必須於是日到仍須宴次投之商人欣躍

瓊州府志

卷四

雜志 遺事

四

而去至則如其言府坐得書懼不敢發欲匿之又中使已見遂因中使回附奏自是得移光州其表云雖遷陵之罪大應立主之功多南海有飛鳥自空中遺糞於舟穢不可聞丁晉公之貶崖鳥雖翔而糞不污至崖盡縱所乘牛馬於山林間數年一夕皆集無遺者翼日遂有光州之命類聚丁謂謫崖州嘗謂客曰天下州郡孰爲大客曰京師也謂曰不然朝廷宰相爲崖州司戶則崖州爲大矣聞者絕倒丁有途中盛暑詩山木無陰驛路長海風吹熱透蕉裳渴思西漢金莖露困憶南朝石步廊江上綸竿輪散誕林

間冠鷗負清涼下程欲選披襟處滿眼赭桐兼
佛桑四六話丁晉公文字雖老不衰在朱崖答
胡則侍御書曰夢幻泡影知既往之本無地水
火風悟本來之不有在海外十四年及北遷道
州謝表云心若傾葵漸暖長安之日身同旅雁
乍浮楚澤之春又謝復秘監書表云炎方萬里
歲律一周傷禽無振羽之期病樹絕沾春之望
人亦哀之談圃

元豐中李廷臣官於瓊筦有一夷人獻錦臂條上
織成一聯云恩袍藍色動仙籍桂香浮乃仁廟
賜進士及第人詩也廷臣以千文易之藏爲珍

瓊州府志

卷四十四

雜志 遺事

五

寶

青瑣雜錄

瓊崖四州在海島上中有黎戎國其族散處無酋
長多沉香藥貨余靖知桂州時吳蒙爲司戶管
內機宜文字以卒五百安撫黎戎蒙謂此不足
以立功卽深入其地反爲掩殺蒙下馬請降戎
得蒙待之甚厚以女妻之而蒙有子在瓊州令
以銀五十星造兩餅贖之戎得餅甚喜遂放蒙
還島上水出黎戎飲四州人少忤其意卽毒其
上流故鮮能入其巢穴國初時有一節度使忘
其名姓王不悅於趙普因使討之王有知術使
士卒以鐵底爲襪入其地多使斬馘至今國中

一石戎過之必懼而再拜相傳王節度使曾坐其上蒙卽荆公夫人之叔父父先妻吳與荆公夫人同母親見蒙說如此

公孫談圃

東坡在儋耳葛延之自江陰往見嘗以親製龜冠爲獻坡愛之而贈以詩云南海神龜三千歲兆叶朋從生愛喜智能周物不周身未免人鑽七十二誰能用汝作小冠岫嶁耳孫創其製今君此去寧復來欲慰相思時整視

詩話

春夢婆家居儋城之東年七十餘常負大瓢行田野間口歌哨遍方饑食遇蘇文忠公曰世事何如婆答曰世事只如春夢耳公復曰何如婆曰

瓊州府志

卷四十四

雜誌

遺事

六

翰林昔日富貴一場春夢耳公曰然因號爲春夢婆公有詩曰投梳喜有東隣女換扇還逢春

夢婆

黃通志

蘇軾與轍相別渡海旣登舟謂曰豈所謂道不行乘桴浮於海者邪及謫儋寓臨高銘其端石視曰與墨爲入玉靈之食與水爲出陰鑑之液懿矣茲石君子之側匪以玩物惟以觀德

同上

東坡云子來儋耳得大狗曰烏喙甚猛而馴隨余遷合浦過澄邁泗而濟路人皆驚戲作詩曰烏喙本海葵幸我爲之主食餘已瓠肥終不憂鼎俎晝馴識賓客夜悍爲門戶知我當北還掉尾

喜欲舞跳踐趁僮僕吐舌喘汗雨長橋不肯躡
徑度清深浦拍浮似鶩鳴登岸劇虓虎盜肉亦
小疵鞭箠當貫汝再拜謝恩厚天不遣言語何
當寄家書黃耳定乃祖阮通志

舊志東坡移廉州以茶孟惠許君瑤且囑曰無以
爲清風明月之贈孟聊見意耳後爲折樞密所
得有詩謝許云東坡遺物來歸我兩手摩挲思
不窮舉取吾家阿堵物愧無青玉案酬公黃通志

朱子語錄東坡晚年文雄健不衰然亦疏魯問峻
靈王廟碑無見識伏波廟記亦無意想伏波當
時蹤跡在廣西不在彼記中全無發明先生曰

瓊州府志

卷四十四

雜志 遺事

七

不可以道理看他然二碑筆特健勁同上

東坡在儋耳日過黎子雲遇雨從農家借籊笠戴
之着屐而行婦人小兒相隨爭笑籊犬羣吠竹

坡周少隱

紫芝宣城人

詩云持節休誇海上蘇前身

便是牧羊奴應嫌朱紱當年夢故作黃冠一笑
娛遺跡與公歸海外清風爲我襲庭隅憑誰喚
起王摩詰畫作東坡戴笠圖蕭志

洪覺範至儋耳嘗謁姜唐佐唐佐他出見其母母
迎笑食以檳榔覺範問母識蘇公否母曰識之
然無奈其好吟詩公嘗杖而來指西木榻自坐
其上問曰秀才何往我言八村落未還有包燈

心紙公以手展開書滿紙囁曰秀才歸當示之
今尙在覺範索讀之醉墨欲傾曰張睢陽生猶
罵賊嚼齒空齟顏平原死不忘君握拳透爪

丹陽葛延之自江陰來見東坡於儋公誨以作文
之法曰儋州雖數百里之聚州人所須取諸市
而足然不可徒得也必有一物以攝之然後爲
己用所謂一物者錢是也作文亦然天下之事
散見經子史中不可倖得必得一物以攝之然
後爲己用所謂一物者意是也不得錢不可以
取物不得意不可以明事此作文之要也延之
拜其言而書紳

瓊州府志

卷四十四

雜志 遺事

八

東坡在海外語其子過曰我決不爲海外人近日
頗覺有還中州氣象乃滌硯焚香寫平生所作
八賦當不脫誤一字以卜之寫畢大喜曰吾歸
無疑矣後數日廉州之命至

東坡自儋耳北歸臨行以詩留別黎子雲秀才云
我本僭耳人寄生西蜀州忽然跨海上譬如事
遠遊平生生死夢三者無劣優知君無再見欲
去且少留後批云新釀甚佳求一具理臨行寫
此以折菜錢俱同上

府志趙鼎至吉陽謝表曰白首何歸悵餘生之無
幾丹心未泯誓九死以不移秦檜見之曰此老

倨強猶昔越明年三月於一德格天閣言趙鼎
李光胡銓姓名必欲殺之降朝旨趙鼎李光遇
赦永不檢舉具令本軍月具存亡申尚書省後
鼎不食而死又十年放還海外逐客獨李胡比
歸矣趙忠簡公謫朱崖士大夫畏秦氏無敢寄
聲張淵道爲廣西帥遣書持藥及酒麵爲餽忠
簡公答書今存張氏陸游曰趙忠簡謫朱崖臨
終自書銘旌曰身騎箕尾歸天上氣作山河壯
本朝嗚呼不可謂偉人乎趙鼎死珠崖扶喪過
郡汪應辰爲文祭之曰惟公兩登上宰皆值危
難之時一斤南荒遂爲死生之別事已定於蓋

瓊州府志

卷四十四

雜志 遺事

九

棺恩特容於歸骨吏付之火其子借三兵以歸

道黃通志

夷堅志云趙丞相忠簡貶珠崖桂林帥遣使臣往
致酒米之饋自雷州浮海而越三日方張帆早
行風力甚勁顧見洪濤間紅旗靡靡互相逐而
下極目不斷遠望不可審疑爲海寇或異國兵
甲呼問舟人舟人搖手令勿語愁怖之色可掬
急入舟披髮持刀出蓬背立割其股一咋舌出
血滴水中戒使臣閉目坐船內凡經兩時頃聞
舟人相呼曰更生更生乃言曰朝來蓋巨鱷也
平生所未覩所謂旗者鱷脊耳所謂吞舟魚何

足道使是魚與吾舟相值在數里之間身一展轉則已淪溺於鯨波中矣吁可畏哉是時舟南去而鱸北上相望兩時彼此各行數百里計其身當千里有餘莊子鯤鵬之說非偶言也此說張子思得之使臣云

容齋隨筆唐韋執誼自宰相貶崖州司戶刺史命攝軍事行推牒詞云前件官久在朝廷頗諳公事幸期佐理勿憚縻賢當時傳以爲笑然猶未至於挫抑也盧多遜罷相流崖州知州乃爲牙校子求昏多遜不許遂侵辱之將加害不得已卒與爲昏紹興中胡邦衡銓竄新州再徙吉陽

瓊州府志

卷四

雜志

遺事

十

吉陽卽朱崖也軍守張生亦一右列指使遇之亡狀每旬呈必令囚首詣廷之邦衡盡禮事之至作五十韻詩爲其生日壽性命之憂朝不謀夕是時黎會聞邦衡名遣子就學其居去城三十里嘗邀致入山見軍守者荷枷絝西廡下曾指而語曰此人貪虐已甚吾將殺之先生以爲何如邦衡曰其死有餘罪果若此足以洗一邦怨心然旣蒙垂問切有獻焉賢郎所以相從者爲何事哉當先知君臣上下之名分此人固亡狀要之爲一州主所謂邦君也欲訴其過合以告海南安撫司次至廣西經畧司俟其不行然

後訟於樞密院今不應擅殺人也曾悟遽釋之
令自書一紙引咎乃再拜而出明日邦衡歸張
詣門悔謝殊感再生之恩自此待爲上客邦衡
以隆興初在侍從錄所作生日詩示仲兄文安
公且備言昔日事乃知去天萬里身陷九淵日
與死迫古今一轍也

會稽志李孟博莊簡公之子也苦學有文紹興五
年進士第三人及第莊簡南遷隨侍至貶所遂
卒於瓊州未卒數月前忽夢至一處海山空濶
樓觀特起雲霄間有軒榜曰空明先世諸父皆
環坐其間顧指其一曰留以待汝旣寤知其非

瓊州府志

卷四十四

雜誌 遺事

七

祥也未幾遂屬疾臨終有雲氣起於寢冠服宛
然自雲中冉冉升舉瓊人悉見之莊簡有詩悼
之云脫屣塵寰委蛻蟬真形渺渺駕非烟丹臺
路杳無歸日白玉樓成不待年宴坐我方依古
佛空行汝去作飛仙恩深父子情難割淚滴千
行到九泉

俱同上

胡銓初在新州夢謁趙丞相鼎久之不出仰視屋
宇皆塵埃取簪欲掃而覺及至吉陽軍所居裴
氏之廬乃趙公故寓也又嘗夢見黎母後十年
乃遷崖州李參政光以詩送之云夢裡分明見
黎母生前定合到朱耶朱耶卽朱崖也

蕭志

儋耳城東郡守陳適創堅白堂後李光更名爲無
倦齋其詩曰已許傾壺就綺羅只因風雨暫經
過不辭美酒十分勸欲聽佳人一曲歌亭上安
觀摩勒果池中難惜右軍鷺使君獨寢空歸去
被冷風清奈若何

知軍黃嗣建籌邊亭於儋耳城東賦詩曰誅茅壘
石結新亭退食籌邊答聖明海外時康民訟簡
同官莫惜更論兵聲調沉雄地可因詩重矣俱
上

輟耕錄閩廣多種木棉紡績爲布名曰吉貝松江
府東去五十里許曰烏泥涇其地土田磽瘠民

食不給因謀樹藝以資生業遂覓種植之初無
踏車椎弓之製率用手剖去子綿弦竹弧置按
間振掉成劑厥功甚艱元初時有一嫗名黃道
婆者自崖州來乃教以做造桿彈紡織之具至
於錯紗配色綜線挈花各有其法以故織成被
褥帶帨其上折枝團鳳棊局字樣粲然若寫人
旣受教競相作爲轉貨他郡歲旣就殷未幾嫗
卒莫不感恩洒泣而共葬之又爲立祠歲時享
之越三十年祠毀趙愚軒重立今祠復毀無人
爲叛建道婆之名日漸泯滅無聞矣黃通志

府志元帥陳謙亨家有侍女名青梅通詞翰善歌

舞聲色并麗至治間文宗至潛邸慕之嘗視其
家以覬窺之意不就因賦詩云自笑當年志氣
豪手攀銀杏弄金桃溟南地僻無佳果問着青
梅價也高

府志撒迪至治泰定間以從潛邸及廉訪兩至瓊
最喜修造叢林見海南僧皆有家意甚不憚嘗
曰何物蠻菩薩無一人天花不着身也至今習
俗猶然近日法司枷號示衆彼慧者曰土蠻亦
有清淨身奈結習未盡累皮布袋受此苦聞者
大笑

舊志蔡氏二女瓊山人父克憲疊山仁政翼千戶

瓊州府志

卷四

雜志 遺事

三

長曰九娘喪父越三十不嫁元亂統父兵保境
東寇陳子瑚陷郡聞其智而有色欲取之九娘
逃入鋪錦岩被熏死舊傳子瑚至設酒迎之子
瑚醉乘間逃鋪錦谷子瑚醒賦詩云一笑花前
醉似泥綺筵歡劇不聞雞馬蹄到此空歸去不
是花迷是酒迷惆悵而歸九娘死岩中谷名與
熏死皆不同一說避本部都帥陳乾富其妹嫁
遵都王和守寡子瑚主簿邱田欲褫之不屈自
縊死俱同上

唐司徒胄曰洪武永樂間吾郡耆德聚於一時學
校則唐公衡趙公謙及余榕隱曾祖諸人鄉落

則吳公伯雄王公惠徐公普楊公升朱公繼鄒
公觀吳公均張公善教武弁則孫公岳謫放則
桑公慎趙公起潛董公哲孫公傳輦或鳴鼓橫
經集冠履以講唐虞或深衣幅巾會詩酒而敦
禮義今日風化之盛豈無自哉此夫子之賢子
賤而必本於魯之多君子也廣於天下爲遠藩
仕籍華秩已少况瓊於廣又爲遠郡成化二年
秋薛公遠爲戶部尙書邢公宥爲都御史邱公
濬爲翰林學士皆拜命在一月之內雖天下望
郡亦希真爲海外衣冠勝事蕭志
積善餘慶先儒論之已詳今徵之吾鄉而愈信如

瓊州府志

卷四

雜志 遺事

十四

唐英之賑饑邱普之掩骨及王惠言楊升薛彥
祥陰德有後之說豈無驗歟後英子舟孫亮相
繼顯普之孫濬彥祥孫遠皆位極人臣鄉人若
驗天道於三氏亦可以爲勸矣同上

府志王文端公直洪武末隨父太守公學郡齋性
雖端重而好遊賞民有張思惠者以染作馴其
衙公喜其朴野每登臨必與之時郡俗村落鹽
蠶小民家婦女多於月明中聚紡與男子歌答
爲戲凡龍岐二水大英白沙海田諸處俱有之
號曰紡場公爲思惠所導亦遍遊觀因作紡場
賦後公旣顯思惠以解役見公於京師相與作

郡東語地之談連夜不息詢及場女舊事兩相
於邑發嘆後思惠歸述其事余先祖因小絕寄
公得詩屢詠而匣之曾雙溪於天順末寄邱
深庵詩亦詠此事蓋其俗雖經革於正統程守
瑩然餘韻猶存至成化中始無矣

黃通志

府志一陽和尚俗姓何洪武間遊食至文昌邁特
韓岍驛宰家岍厚遇之一陽病岍救療備至後
於七月十五夜死岍具棺以葬於西坡地隣里
以岍注意於方外士皆哂之岍曰費錢七百八
十文耳不足惜也明年是夜岍夢一陽被黃衣
立牛欄中以二手作上下指狀早視欄中牛生

瓊州府志

卷四四

雜志 遺事

五

一犢毛作白花文若袈裟然心竊識之後犢出
角一立一垂如所指狀岍以爲一陽後身無疑
遂令僮善芻之惜不教耕作鞍跨之走勝馬一
日岍乘行海邊遇倭賊追逐驚謂牛曰爾一陽
耶當濟此難牛走異常得脫後爲焚牂謝家竊
殺岍獲緝賍謝曰吾分食此牛十三人人願辦
錢六十文以償公長者幸無聞官岍私計錢適
合前葬僧之數大爲嗟悼而寢其事因終身與
子孫戒至今勿食牛肉

王克義永樂丙戌進士授崇仁知縣大臣薦其才
有博學宏辭等語其試蓬萊春曉歌云碧雲初

散扶桑樹六龍已駕羲和馭海上神山曉色分
琪花瑤草濕香霧雙雙彩鳳棲梧桐噉噉相應
朝陽東四海蒼生盡蘇息萬國如在春風中憶
得當年來上國棘闈鏖戰文場屋瓊林宴罷醉
扶歸不讓當時步瀛客厥來出宰十八年於今
奉詔還朝天上林春色正明媚百花燦爛爭芳
妍自喜生逢堯舜世愧乏涓埃酬聖帝吟咏非
才丹淚垂強作狂歌歌舜治

黃通志

唐亮字景明隨父舟宦衢州游常山中浙江鄉試
聯捷進士歷官詹事府主簿永樂二十二年九
月十五日欽奉仁廟聖旨我在青宮時恁是我

瓊州府志

卷四十四

雜志 遺事

共

舊人先皇帝法度嚴緊恁每受了些驚怕我一
向忘了爾御手親授緞子寶鈔賜羊酒米遣光
祿寺送至家當日欽陞直隸寧國府同知謝恩
詩云內侍宣傳出建章東宮寮屬被恩光親勞
御手分文錦又敕中官賜玉漿五品大夫名不
忝萬年天子壽無疆小臣戀關心常在時望彤
雲捧玉皇

徐祥萬州人世本常山父官稅課局還家時生祥
半月鞠於母登永樂戊戌進士尋抵其家原籍
題詩云曾念詒謀在海涯棄予隘巷一呱呱誰
知萬里支離子天肯教來識父家

府志林桐字茂材南橋人有襟度然遇酒卽狂肆
大醉後或着簑效古牛驚鼻囚諸飲或舞蝦蟆
鶴鷺漁唱巫歌謹座不休一日乘醉造王處士
瓚宅見所頓壽具大罵曰此惡物吾讐也平生
恨見之何爲置此怒呼斧破之瓚急移置以避
後以上舍生除章貢司訓生徒方羣謁見其醉
懸水杪皆却退桐以手招曰休避休避請看新
掛教範士皆驚訝後值不飲時斂襟危坐議論
英發且持廉仗義始知重之邱深庵常譬之爲
水秋則漫山平谷折木崩岸入冬則成川爲淵
供飲利漑俱同上

瓊州府志

卷四

雜誌 遺事

七

符芳瓊山人以歲貢尹瀧水遷江二縣陞福建運
判邱深庵莫逆交嘗寄書求所作曰聞君新詩
多學杜春來花鳥添愁緒胸中太學萬卷書脚
底關山幾程路學柳無如魯國男效西易似東
家婦願求一破蟋蟀鳴會須爲下蟲魚註又像
贊厥像維某曰吾老友制行罔頗存心不苟卽
之者如挹春風親之者如飲醇酒情樸而真交
敬而久牛志

成化丙午丁未間文昌縣東文峯下野蠶成繭舉
人韓俊賦畧形賦熒然具叢點之光殼脫爛然
備五色之章食葉有類乎莪桑不假乎取伐斧

折附枝有類乎植筐不待乎曲簿更張蛻形成
繭纍遽連房多終以十少奇而三練分稱效曰
紫曰黃紅就卷束可衣可裳

黃通志

正德丙寅冬萬州雨雪時舉人王世亨歌撒鹽飛
絮隨風度紛紛着樹應無數嚴威寒透黑貂裘
霎時白遍東山路老人終日看不足盡道天家
雨珠玉世間忽見爲祥瑞斯言非誕還非俗越
中自古原無雪萬州更在天南絕巖花開發四
時春葛衫穿過三冬月昨夜家人索衣檳榔
落盡山頭枝小兒向火圍爐坐百年此事真奇

稀上同

瓊州府志

卷四十四

雜誌 遺事

六

陳在廷被賊林道乾執而鬻之倭倭主通文墨官
爲明通事加列國通使留三年後以靖海出行
遇商舶載之歸賦詩別其國主曰深入不毛非
我願縱多金玉覺心酸於今高挂雲帆去空盡
諸夷百萬觀至聞謁省學使者試遵海而南文
賞之曰異日衣冠器也爲給路引還鄉

蕭志

邱文莊門人粵西蔣冕撫其師遺事云先生年七
八歲時從大父往鄉間學館適教者以鴈鴒爲
題命學子作詩因屬先生作先生口占以答之
其中一聯云應與鳳凰爲近侍敢同鸚鵡鬪聰
明教者驚曰是兒年少作此詩他日所就豈可

量乎遂加禮待之 先生十餘歲時作濁海歌
其詞可與吳隱之貪泉詩並觀歌曰天下百川
皆清漪一流入海便成緇茫茫誰復辨涇渭混
混孰與論澗淄洪濤巨浪轟轟怒不覺已身如
穢瓠看來何似山下泉清香凜冽爲人慕我向
潮頭三嘆息志欲澄清勢未及願言上帝檄天
吳一夜黑波變成碧穢瓠二字出柳文此詩聞
之瓊人瓊臺藁中不載同上

菽園雜記閣老邱公世史正綱有云佛氏入中國
始鑄金爲像後又爲土木之偶後世祀先師亦
以塑像不知始何時考史開元八年改顏子等

州府志

卷四十四

雜志 遺事

九

十哲爲坐像則前此固有爲塑像者但先聖坐
而諸賢皆立至是乃改立爲坐耳按晦庵先生
跪坐拜說聞成都府學有漢時禮殿諸像皆席
地而坐文翁猶是當時琢石所爲尤足據信及
楊方子直入蜀帥幕府因使訪焉則果如所聞
者且爲倣文翁石像爲士小偶觀此則先聖先
師之置像蓋自漢以來已有之矣黃通志

王桐鄉云國初海上有煉形者自焚其身土人肖
像祀之有東土南天北天之號俱謂之佛北天
舊有水像在臨高居洋山庵中成化初適有神
物來憑其像事甚奇異吾友王聰子達始事之

虔每欲神降卽置像竹輿中令二人手鼻以板布灰神至用輿脚書詩辭甚有音響又組織書史中語爲四六句對偶亦精緻其諸陰陽術數書皆能通之與專門術士無異凡來問休咎者絕不及時事但因人規益不啻良師友感化者甚衆聰嘗與其弟勝失友愛者數年感之兄弟如初鄉之人士好事者愛其詩詞亦爭肖像而事之未暮年殆遍闔郡城咸曰此比天佛云亡而復回也辯之曰四時之序成功者去造化萬物孰有向於有而不歸於無者蓋氣聚而來氣散而往常理也反是焉必有不得其常者矣記

曰衆生必死死必歸土骨肉斃於下陰爲野土至其所謂其氣發揚於上爲昭明熏蒿悽愴者不過狀其神氣之著未有能造人言語肆胸臆於冥冥之中如此者惟不得其死者則氣未散而不能去於是或乘風雲或倚木石附人身而爲妖孽怪異如春秋時鄭伯有之厲晉世子申生之討夷吾及有神降於莘有聲與人接石言於晉魏榆師曠曰石不能言或有鬼神憑焉又若漢武時長陵女子以乳死聞其言不見其人時去時來則有風肅然謂之神君見於史傳暨稗官者甚多此特有鬼神來附朽像而假托也

天佛以惑人耳

王桐鄉先生官臨江時曾承遣往湖廣採宮殿木舟過鄱陽有硯隨舟而浮撈得之磨面耀金兩片背銘曰誰割紫雲落我書几其夾津津中含霖雨曷發其藏蒼生之喜後有名僧告曰此乃陶五柳物也聞每數十年雖必一見然不可鈎致今以子問學故付之耳桐鄉特置盒藏之每私戒論子孫以爲世寶近聞爲他人所得

俱同上

隆慶三年巡撫都御史海瑞疏吳淞江下流上海淤地萬四千丈有奇江面舊三十丈增開十五丈自黃渡至朱家橋長八十里明年春瑞育三

壇州府志

卷四十四

雜志 遺事

三

吳入海之道南止吳淞北至白茆中止劉河劉河通達無滯吳淞方在挑疏土人請開白茆計濬五千餘丈役夫百六十四萬餘又言吳淞役垂竣惟東西二壩未開父老皆言崑山夏駕口吳江長橋長洲寶帶橋吳縣胥口及凡可通流下吳淞者逐一挑畢方可開壩從之

明史河渠志

王大宗伯宏誨所居之左有馬鞍岡與文筆金雞二山錯立掩映文筆從平地特起高數百仞天色晴霽輒有蒼烟一道界破碧空若天門華表歲多科第則吐光如炬王尙書詩云不知浩漾中地脈潛無處突然五指伸復此擎一臂絲文

筆渡清溪而西爲金雞嶺嘗有金雞飛鳴其上
故名蘇子瞻詩人間文筆無雙士天上金雞第
一星至今文士舉者每以西科蕭志
鄒高令定安時正身率物案無留牘抑強扶弱民
甚便之以取給不應爲郡守所銜改潮州教授
臨行詩曰世路人情蜀道難幾回飛夢繞鄉關
一肩行李梅花瘦萬里冥鴻任往還人高其曠
達云

吳誠瓊山大攝人事繼母雲不得其歡心年二十
五失偶遂不再娶識者謂曾參因傷伯奇之難
而欲善其子王駿度無華元之賢而欲美其身

瓊州府志

卷四十四

雜志 遺事

三

其心之所感或有同然歟

陳嘉猷以清節自負歷官有聲後以山東濱州別
駕解組歸里大參趙大綱賦詩餞之曰傲吏甘
投散高人不用名離杯傾月小別棹泛鷗輕蜃
海孤雲意珠崖萬里程共推陶靖節五柳得初
情俱同上

月山叢談梧州山界有海灣上下五百里橫截海
面且極其深乃往瓊之路當二月之交海鱸來
此生育隱隱輕雲覆其上士人占知之俟風日
晴煖則有小海鱸浮水面眼未啟身色赤隨波
蕩漾而來卽用舴舨裝載藤絲索如臂大者每

三人守一莖其杪分贅逆鬚鎗頭二三枝於其上
遡流而往遇則並舉鎗中其身縱索任其去向
稍定時復以前法施射一二次畢則掉船並岸
割置沙灘徐收繚此物初生目合無所見且忍
鎗疼輕漾隨波而至漸登此處潮落閣置沙灘
不能動舉家分臠其肉作煎油用向記桂林帥
遣使自雷州浮海往瓊所遇卽此物也黃通志
海槎餘錄玠秋晚巡行昌化屬邑俄海洋烟水騰
沸競往觀之有二大魚游戲水面各頭下尾上
決起烟波中約長數丈離而復合者數四每一
跳躍聲震里許余怪而詢於土人曰此番車魚

也閒歲一至此亦交感生育之意耳今中州藥
市懸大魚骨如杵白者乃其脊骨也

月山叢談海南取沉香束茄南旋風諸香每數人
合夥裹半月乾炒相對深入山中求之或一二
日卽得之或半月不得徒手歸者亦有命也有
香之處卽有蟻封高二三尺隨挖之則其下必
有異香大抵沉香爲多亦有深入龜人境內中
州水晶皆爲玩好彼處五指山榜滿山皆是望
之如雪而光采過之人取以爲假山有高至丈
餘者亦不足異也

續志嘉靖庚戌文昌縣東莞客人李希易以妖術

飛書稱爲神符誘瓊山愚民蒙瘖據餽頭嶺搆賊黨買造兵器私設官職聲言海上有大船相迎欲抵本縣從清瀾港渡海以圖大事瓊山巡捕官率兵往勘逗遛不敢迫人心皇皇皆欲匿山航海以避其鋒或有信惑神符而欲爲之響應者時縣丞林岳訓導林士奇督合兵民多方備禦旣而希易被誘至欲潛往清瀾買兵器值縣募民李文選率鄉兵數十人把截要路於是遂執希易送縣訐出妖幻真情械治解府其黨遂平

續志嘉靖辛卯海寇許折桂沿海劫掠瓊山官商

瓊州府志

卷四

雜志 遺事

三

民船○辛卯六月海寇何亞八同番賊由石礮抵白沙東瀛縱火劫村虜男婦每傾產以贖無贖多鬻之番八月復至官軍陳忠言等追至雷州海康戰敵而死十二月海寇十餘人復聚白沙兵憲何元述親率士卒千餘人禦之賊酋數人登岸官軍潰走百戶尹恩軍士雷旭等戰死○甲寅聚舖前港軍士陳進等禦敵手擊數賊而死七月颶風海寇覆舟餘黨十一人登大林都海岸夜抵埠頭墩殺戮居民一家殆盡官軍千餘人不敢進敵至文昌地面寇以饑靡官軍始梟首獻功是年又寇臨高縣馬裊新安博舖

黃龍等諸港知縣陳址率鄉兵黎兵邀戰賊敗
溺死奪回被虜人口賊望風遠遁西路皆賴焉
太守張子安白於巡按郭文周獎之尋掠文昌
縣濱海諸村燒毀舖前巡司鄉兵追捕有被其
格殺分骸者力遂不支申請府道委官勘驗給
銀埋葬修治營堡置兵守之賊又移泊清瀾海
旁逼近所縣軍民危懼知縣張文錄發遣民兵
分據要害縣丞夏興仁發遣鄉兵夫運木列柵
控制咽喉并設望樓日夜巡視所官相與協力
備禦賊知難犯遂不敢近庚子海寇登白延茂
亭村入生員林繼統等家虜男女十餘口置諸

舟中泊馮家灣一女恥受污辱而死時清瀾所
官募得橫江大船數隻比至賊乃舉帆而去一
婦丁氏復投水死至廣海地方分散各去繼統
歷訴府道撫按百戶安節竟坐失機俱同上

雜志五 紀異

地理志瓊臨高縣西十里有毘耶山建武二年村

民王氏者二人長曰祈次日律與鄉人王居傑

獵於山憩石上所為石所吞啗居傑三引刀不

解祈被吞未盡間忽作聲曰我為毘耶天神隱

此石室已後可以純白三牲一祀我言訖遂浸

入石中不復見宋靖康間逆會王文滿煽亂率

眾環攻臨高民受荼毒無能禦者吏民乃禱之

於毘耶神須臾蜂蠆彌空肆毒行螫羣盜奔遺

民賴以安益神其祐黃通志元范梈有記文見藝文

府志唐貞觀初析崖州地立瓊州於麻欒都一圖

瓊州府志

卷四十四

雜志 紀異

美

大江之濱城垣治址俱具解宇初豎一夕梁飛

失向後覓得之於今城遂因定州治今衛基是

府志唐時有尹文昌鄧姓者攜家眷三十六口至

何恭宿於路當夜風雨交作舉家不知所在於

此旦暮嘗聞鑼鼓聲俱同上

朱崖境內有一島居民甚眾地無井泉海水特鹹

取草木汁飲之號木飲州酉陽雜俎

新繁縣東湖德裕為宰日所鑿夜夢一父老曰吾

潛形其下幸庇之明府富貴今鼎來七九之年

當相見於萬里外後於土中掘得一墓徑數尺

投之水中而德裕以六十三卒於崖果應七九

之讖北固瑣言

宋史萬安州宋太宗時嘗獻六眸龜今萬州也然
欽江寶產之張世南游宦紀聞東坡謁呂徵仲
值其晝寢久之方出見便坐有昌陽盆叅綠毛
龜彼指曰此易得耳唐莊宗時有進六目龜者
敬新磨獻口號云不要鬧聽取龜兒口號看他
六隻眼兒睡一覺抵別人三覺世南嘗疑寓語
以諷呂未暇尋閱質究偶因見嶺海雜紀有載
六目龜出欽州只兩眼餘四目乃斑紋金黃花
圓長中黑與真目並排皆正不偏子細辨認方
知爲非真面目黃通志

瓊州府志

卷四

雜志 紀異

三

府志東湖在縣東一十五里博茂都故老相傳昔
有巨室陷下爲湖水深黑鄉人建廟於側其中
有銀器人欲假則具楮疏香酒告廟少頃器浮
出如數用畢復還人以爲常後有錫器易還竟
日不沉其人自駭以舊物還之乃沉自是不復
出宋末鄉之老者猶言目擊其事又元時天旱
潭中一物如柱直豎高十餘丈須臾而倒其聲
撼動不二口大雨後遇旱郡縣卽取水以禱今
則淺矣

府志縣北十里白沙津商舟所聚處也然淺窄不
通大舟每秋夏颶發多風濤之虞宋自熙寧中

筦帥王光祖以來累欲穿港而未能至淳祐戊申颶風大作夜忽自衝成港人以爲神因名曰神應港

府志史云崖州嘗獻徑寸珠其使者陰易之上心疑焉名伯醜筮伯醜曰有物出自水中質圓而色光是大珠也今爲人所隱具言其隱者姓名容狀如言薄責之果得本珠上奇之賜帛二十匹俱同上

千里石塘在崖州海面之七百里外相傳此石比海水特下八九尺海船必遠避而行一墮卽不能出矣萬里長堤出其南波流甚急舟入回溜

瓊州府志

卷四十四

雜志 紀異

三

中未有能脫者番舶久慣自能避雖風汛亦無虞又有鬼哭灘極怪異舟至則沒頭隻手獨足短秃鬼百千爭互爲羣來趕舟人以米飯頻頻投之卽止未聞有害人者海槎餘錄

魏生得一美石後有胡人見之曰此寶母也每月望設壇海邊置石其上可得美珠原化記

勞將軍廟去儋城東六十里許祀屋久廢只隙地在焉凡新官到任必先此設祭祀典不載其名爵父老相傳云此神乃馬伏波部下先鋒將方凱旋時牽馬飲於河馬忽覩水中影雙蹄奮起傷其陰而死遂爲神余任時彼中以例祀祀畢

父老喜告曰任內當大吉未逾年新守至亦以例祀衆咸驚報曰祭器無故自裂於案任內當不吉後歲餘守卒此神亦靈驗矣哉

海槎餘錄

石相思子生於海中如螺之狀而中實若石焉大比豆粒好事者藏之篋笥積歲不壞亦不轉動若置醋一盂試投其中遂移動盤旋不已亦一奇物也

同上

府志鯉魚潭在澄邁縣南三十里林表村深碧中有異魚如鯉身首稍圓不下千百數以飯投之始則如掌大者羣食再投則盈尺或二三尺者出食人不敢取水雖漫魚不離所問有隨水出

瓊州府志

卷四十四

雜志

紀異

无

者人獲而剖之血流滿地烹之成水禱雨隨應上有聖母祠

黃通志

府志崖州北五里北廂豺狼村嶺下有石狀如龜長尋廣二尺初在遷拖村前水邊夜每出踏傷田禾人厭之乃走此尋踪獲之折其一足迹今猶存

府志紅白二龜石在文昌縣北五十里南溪都中有紅白二龜禱旱紅出則雨白出則否

俱同上

龍堆石在瓊山縣東那社都里人常獵忽一石墜網中擲之田間移網他處石復在網怪之因與約曰果神吾以茅七莖鼻汝往山奉祀鼻之茅

果不折遂結茅祠祀之一夕里人夢上帝云前日之石乃西方萬壽福神遺以護物石初甚小歲久漸大高五尺許蒼碧秀峙鄉無火盜有疾禱之卽愈因名那社山蕭志龍潭在瓊山縣西十五里博崖村有吳姓者居其地富而不義一夕風雨交作其家遂陷爲潭其深莫測因名曰龍潭

銅銚石在那社都轉落溪中其下有六巖水注其中轟聲如雷旱聞之則雨雨聞之則晴鄉人祀其神曰銅銚大王遇旱禱輒應

了浪浮石在縣西元蜚民紀姓者捕魚忽有一石墜網中棄之少頃復入網紀怪而祝曰若果靈能使我多獲魚當祀汝是日得魚果倍

瓊州府志

卷四十四

雜志 紀異

三

大王神石在蜚村都昔有老婦姚姓者浣紗於河忽一石似雞卵逆流遮其足擲之復至婦怪之攜歸行數十步漸重棄之途歸語衆共往視之石已高大不復移動衆中一人忽自跳躑謂人曰我石賢神也若等祀我當保障爾村因爲立廟祀石於中號曰石賢大王天旱祈禱立應魚爺井在文昌縣西五十里那郭都井中多魚中一大魚頭白俗號魚爺人欲觀者以楮錢祝之有小魚數尾先出至魚爺出每激水噴人人有

取其一魚者卽病狂俗傳井與海通

紫荆井在樂會縣北偏村泉清味甘迥異他井太旱不涸將雨井石必先流汗歲豐井中先有禾氣相傳先代常有老人皓髮童顏坐於井中紫荆樹下至嘉靖初復見羣兒譁噪逐之自是絕跡井雖在而泉味減矣俱同上

府志龍宮潭在縣南七十里保義鄉西隅都新安江中舊傳國初有一白牛時沒潭中必倦喘而出其主異之乃置刀於角後復沒見一蛟傷而浮起乃知與蛟鬪也至今風雨忽有龍出沒旱

時鄉人往禱多驗

黃通志

瓊州府志

卷四十四

雜志 紀異

三

舊志定安縣後深潭有兩石似龜或擊折一頭江水為赤數年又有五泥人卓立如人形知縣有清德則沙開成潭而泥人出若貪汚則淤塞而泥人隱相傳吳定實羅昌鄔高時潭深數丈餘皆填塞同上

浮石在瓊山縣東符離都明洪武間水飄至白石一片屢為妖孽鄉人廟祀之始息蕭志

儋耳城舊在儋州高麻都南灘浦漢樓船將軍楊僕所築城瀕海每多水患一夕風雨交作有一婦人驅鬼工持畚插為築作聲聞至旦而城移今所矣疑為誠散洗夫人也

崖州西五十一里黎伏鄉龍樓嶺畔有石狀如銅鼓黎人每聽其鳴則羣聚殺掠人不敢過後官軍燒破無聲寇亦息遺跡尙存

崖州東八十里抱勸村有二石形似蛇頭初嶙首羅練獵於荒野聞犬吠聲往視之見二蛇頭出地乃抽箭插地禱曰若許村此三日斫應筭次又以穀埋其地日如靈三日穀亦實後皆驗遂村此今爲博村二石尙存

崖州東一百二十里羅活崗有大石黎人羅艾因獵過之石啣其犬足艾以弓撲之石舍犬啣弓艾又以左足踏之石舍弓啣足吞之已入半身

瓊州府志

卷四十四

雜志 紀異

三

艾父界率衆往救不得出許以純白羊牛祭之乃漸出至膝傍有觸禁者遂被吞沒界怒殺觸者因念其子以黎被覆石上至今石色斑駁如黎被紋俱同上

府志正統七年壬戌八月辛丑鴈集郡學洿池邱

濬有記黃通志

府志事理亦有不可盡窮者成化丁未遷府治採鐵力木於永安截一大者爲柱中特空窾藏一活蟹建江有一石羣匠度取階礫中藏小窾忽擊裂而焰耀如電匠皆暈仆又雷破一大竹節中有跡蜿蜒如蛇狀是無須而生者必怪毒郡

境多椰樹雖絕枝無陰然以株高葉叢多蓄蛇
虫精毒故歲久數招震擊

府志郡城北濠水深碧時噴濺有一物在中成化
初一夕乘風雨而騰墜於文昌抱虎海岸郡使
人繪其形似蒲牢而非蒲牢四足拳肉無指爪
圓頭巨尾鱗仰貯水擊之喊聲牟然如牛今濠
於起處遂淤淺

宏治十五年那邕都國子生張銓妻馮氏既妊將
彌月忽腹下側腫奮如刀背狀未幾折副產媿
從出今子雲龍塊然在

府志正德二年舊縣後陳奎家僕陳貴妻胎乳一

瓊州府志

卷四十四

雜志

紀異

三

男二女有大烏蛇盤男搖籃上母不敢近失乳
後擊蛇死男隨亡嘉靖七年瓊山民楊姓生一
子體髮純白如雪雙睛如貓年二十餘斃十三
年城東民家有牝猪生一子其形類象

正德十五年八月澄邁縣西隅都民曾孜石窟田
下邱連苗移疊上邱約高幾尺

萬州志嘉靖五年六月二十六夜萬州正廳無風
兩傾壓死者七人先一日趙州守允宗試生童
百餘人於廳繼夜隨傾說者謂童生之福

續志嘉靖七年萬州白氣如虹自西直入天河凡
十夜方釋十四年瓊山虹落知府王儼唐鞠舉

人岑英家皆在城西雖不同日而紅綠光耀無異其起止僅覆屋非若常虹亘天有頃而散月山叢談嘉靖丁酉瓊州諸生應試回渡海先一舟過中途見一神立水面約長丈餘朱髮長髯冠劍偉然衆懼咸俯伏叩首神人掠舟旁迤邐而去次日三舟過復見之諸生大噪以拒之神忽不見須臾風大作三舟人咸溺諸生皆以帕聯臂並死海上

嘉靖十七年七月朔日會同裏洞村前忽見田中風號木噴烟騰聲旋轉轟烈疾如飛電上有飛艇萬千鄉中老幼過客觀者以萬計初疑爲鬼

瓊州府志

卷四十四

雜志 紀異

三

風俄而過山搗田禾草木林葉如故下田溪聲勢愈烈飛草颺泥散亂滿空少頃雷聲微吼與勢交振陰雲四起變黶下際未幾而化田中寂然伸目視之微見半身及尾數丈翔翺於空中始知其爲龍起云因改裏洞村爲起龍村二十四年六月二十五日東潭一物隆起噴水自蔽在田者熟視見其首尾鱗角屢起屢踏盤旋久之後有一龍自潭口逆而上垂尾相曳以身偃水覆舟不可勝紀

俱同上

嘉靖三十年樂會白石鄉有大石如屋徐行數百

步蕭

志

萬曆十三年崖州官塘民林本欽妻陳氏一產四子州守給賞雞米衣服後存二子

萬曆二十三年瓊山那社都澄邁三軍村山石忽自裂中有小石皆方形如指輒數十相連流出不絕久之乃已

萬曆二十七年七月二十七日文昌泮池石浮先三日學後洗馬河石亦浮人聚觀之數日復沉萬曆三十八年儋州南頭營山有大石自山頂徐行而下跡如古道

萬曆三十九年南灘浦港內一石浮水面人聚觀之良久復沉俱同上

瓊州府志

卷四

雜志 絕異

三

康熙三十八年五六兩月有元寶從空中飛過往南一路而去有聲鏗鏗然前有黃旗二面中元寶不計其數未有黃色如紙條尾之自午至初未刻方止如此者兩月凡官吏兵民無不仰視康熙四十八年崖州有白鼠數千自西渡河至州散入各村

雍正七年五月會同太平都竹山村陳宅水母牛一胎三子白毛一紅毛二俱蕭志

附載同治五年闔府呈請封禁昌化石礫山全案
欽命廣東分巡雷瓊兵備道兼管水利驛務加十級紀
錄十次孫 爲示諭事案奉

鎮守廣州將軍兼署兩廣總督部堂瑞 憲牌開
據瓊州府十三屬紳士瓊山縣中書吳儁等遣抱
吳升赴轅呈稱竊惟人傑必由地靈實賴山川之
毓秀而小利釀成巨害亦爲孺穉所傷心瓊之爲
州孤懸海外由安南導其脈至昌化發其源有山
特起於其邑中縣亘儋州周圍八十餘里實爲五
指來龍之祖闔府作鎮之區十三屬之地脈因茲
發祥數千載之人文由其孕育東坡翁云 上帝

瓊州府志

卷四

附載石礫山案

三美

賜之以奠南極瓊甸借之以啟文明卽謂此也近
有無知大棍勾香山監生林騰漢等串引洋人欲
規重利謂此山生有石礫產有金銀竟行欺罔呈
請開採雖假爲獻利之計實暗存坑害之心試思
此山爲全瓊之巨鎮有瓊州則此山不可損無此
山則瓊州直可無嘉慶初年議開一次因而兵戈
屢作疫亂齊興當道據以上陳奉

命禁止然人文由是寢衰凶荒因之叠見瓊人尚有悻
心近年來元氣漸將復原利徒又將繼起幸蒙
中堂燭知其奸已行禁止但恐奸人詭計百出謀
動多端設微利以誘人借奸棍爲牙爪戕傷地脈害

及生靈更恐募集多人必致煽擾黎衆生變將形于旦夕擔憂固不獨瓊人職等世籍是邦久資庇蔭廬墓所在性命相依勢難坐視其陸沉奚忍默容其坑陷聞之者人皆切齒見之者士盡同仇借鑒前車思防後害只得瀝情乞示存案永遠嚴禁不許開鑿俾全瓊之保障無傷海外之蒼生籍庇等情到本兼署部堂據此當批林騰漢等私往昌化開山一案先經嚴飭禁止拿解究辨茲復據呈各情候行瓊州道府查明立案飭將山場照例封禁不准棍徒再往私開生事以肅法令而順輿情亟候行司知照等因除揭示及行東藩臬二司知

照外備牌仰道即便遵照呈批事理查明立案飭將山場照例封禁不准棍徒再往私開生事倘敢故違立即嚴拏稟請究辨毋違等因並奉署廣東撫部院郭 憲批同前因各到道奉此查此案前經本道稟奉札飭嚴行禁止並飭督拏林騰漢解省究辨當即會同瓊州府示諭儋昌兩屬一體遵照在案茲奉前因除札瓊州府轉飭昌化縣查照立案並將山場照例封禁外合行出示曉諭爲此示諭闔屬沿海澳甲商民人等知悉嗣後如有不法棍徒再往私開生事立即嚴拏稟請究辦切勿稍事徇護同干咎戾各宜凜遵毋違特示

雷瓊兵備道孫

瓊州府正堂五 爲會銜出示曉諭事同治五年

正月二十一日奉

欽命鎮守廣州將軍兼署兩廣總督部堂瑞 憲札

同治四年十二月初八日據稟據瓊州府稟同治

四年十一月內奉

藩憲札行香山縣監生林騰漢稟請開採昌化縣屬黎崗石碌奉

撫憲批准承辦等因當經轉行昌化縣查照在案
隨聞該監生林騰漢帶同洋人數名乘坐火輪船
駛至瓊山縣屬之海口港外灣泊查該監生呈請

瓊州府志

卷四十四

附載石碌山案

三十六

開採石碌山原係自行承辦今既與洋人同來自
應確切查明稟報察核當卽委員前往確查稟覆
去後旋據委員稟稱飭轉該監生林騰漢面加詢
問據稱現坐火輪船船主名阿根船上洋人共十
人一名高露雲卽三桂一名高雲係英國人其餘
八名係高露雲夥伴均新加波人伊等火輪船擬
在海口港外暫泊數日卽赴昌儋交界之海頭地
方灣泊招工進山開採等情並據海口澳甲報稱
該火輪船已於十一月初八日駛往昌化等語由
府轉稟到道據此理合據實稟明察核等山並據
瓊州府稟同前由各到本兼署部堂據此正在核

辦間卽於本月初八日准 署撫部院咨會內開
此案據瓊州府具稟前由當批查此案係由江蘇
候補馬道屢次稟請開採昌化銅斤粵東鼓鑄停
廢多年亦可藉資開辦飭該道與藩司細心核議
暫准試辦並無洋人招工開採之說該處出產銅
礪均屬黎崗若由外招工前往尤慮滋生事端仰
布政司迅飭該府移詢洋人高露雲等是否林騰
漢邀請幫辦因何並無申陳一面由該司傳詢馬
道查明林騰漢因何挾同洋人前往該道知情朦
稟之咎恐亦難辭也除印發外相應咨會查照等
因又於本月十二日再准 署撫部院咨開據雷

瓊道稟同前由復查明通商章程第九款一英國
民人准聽時照前往內地各處遊歷通商執照由
領事官發給由地方官蓋印經過地方如飭交出
執照應可隨時呈驗無訛方准放行僱船僱人裝
運行李貨物不得攔阻如其無照其中或有訛誤
以及有不法情事就近送交領事官懲辦沿途止
可拘禁不可凌虐又第四十七款一英商船隻獨
在約內准開通商各口貿易如到別處沿海地方
私做買賣卽將船貨一併入官等因是英國人在
內地游歷均以執照爲憑其沿海地方非通商口
岸私做買賣者船貨一併入官今該監生林騰漢

串同外國人徑赴昌化縣黎岡諸山並無執照而招工開採銅礫又更甚於貿易應卽按照條約辦理除札雷瓊道瓊州府昌化縣遵照將該監生林騰漢嚴拏解省以憑訊辦一面飭知英商高露雲卽三桂并高雲等趕速駛回香港無爲林騰漢所誤如有逗遛等事卽按照條約將英船貨一併入官仍查照條約第九款事宜將該英商高露雲等送交英領事懲辦沿途拘禁護送惟不可稍有凌虐本署部院商知英國羅領事以爲此係正辦該英商高露雲等如有抗拒卽由該道府及昌化縣據實稟明以憑劄知羅領事查辦外咨會查照等

因前來合就札遵札到卽便遵照督同昌化縣迅將監生林騰漢嚴拏解省以憑發審嚴究辦理其英商高露雲等亦卽按照條約妥解來省送回英國領事懲辦嗣後遇有外國人到瓊務當循照條約查驗有無領事請給印照分別核辦其火輪等項船貨私到未通商港口並應嚴查將船貨照約一併入官以肅海防切切等因並奉 撫憲行同前因奉此查本案先據昌化縣稟報該監生林騰漢乘此輪船至海頭地方灣泊旋駛回香港等情當經本府具稟 各憲請將停止開採緣由札飭香山縣就近傳諭該監生知照一面札行 儋州 遵

照並由府出示曉諭在案茲 本道訪聞儋州昌
化交界之海頭地方有外來游民在彼居住誠恐
勾結本地商民私入黎峒開採石碌滋生事端除
札儋州昌化訪拏究辦外合再出示曉諭爲此示諭闔
屬沿海澳甲商民人等知示嗣後如有奸商乘此
輪船帶同洋人前往儋州昌化屬地方開採石碌該澳
甲等立即查明就近稟報地方官分別查拏解辦
附近商民人等不准與之私做買賣及聽信外來
游民引誘私入黎峒採挖石碌賣與洋人倘敢故
違一經查出定即分別嚴拘從重究辦其各凜遵
毋違特示

按石碌山爲吾瓊發源地脈與古臈臍山俱爲
峻靈王所鎮東坡所撰廟記言之綦詳山名載
在舊志道光庚子張翰山方伯重修特沒其名
嫌其以利炫人也同治三四年間土棍勾引洋
人希圖開鑿風旱大作年爲不稔者三同治四
年臘月兵備道 孫公觀知府 五公福會稟
兩院請行禁止五年二月適院試期闔郡紳士
復聯呈兩院請爲立案蒙總督大學士 瑞公
麟撫院 郭公嵩壽牌行藩臬兩司並道府昌
化縣五道衙門立案嚴禁茲將全案備錄俾世
籍茲土者觸目警心永遠護守庶地靈人傑獲